



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :

Tir Yimyim

tiryimyim@aolima

tir yimyim

TAPAK 3

Malaysia PM tasenba tenangzüktepa agiba sentong nung maden

TMC-i Assam CM Sarma aitsür



VOL. XVIII NO. 318 (ADOK 318) DIMAPUR

SANGTENNÜ (TUESDAY)

LUROI (AUGUST) 31, 2021

₹ 5.00

## Sep 18 nü NSF indang federal assembly alitsü

**Dimapur, August 30, 2021 (TYO):** Naga Students' Federation (NSF)-i kümsük 2021-2023 atema mezüngbuba federal assembly ayonga amongtsü.

NSF indang federal assembly ji Mao Students' Union ajanga achayanger aser September 18 anepdang 11:30 ako nung Asufii Christian Institute, Punanamei Mao nung amongtsü. Iba ya Manipur kübok Senapati district nung lir.

"Covid-19 wara den tanga tenokdangbatem aliba ajanga NSF kübok unit shia nungi teshimtet nübo anana dang jaoker" ta NSF

speaker James Brilliantson Kashung-i sangdong ka nung ashi.

Federal Assembly nung onük benoka jembinürtemi pei pei unit ketdangpur indang official letterhead nung zülur assembly tenzüksü gghonda ka jelia agütsüsula, ta NSF speaker-isa ashi.

Iba mapang ketdangsurtemi lateta aliba SOPs sülen anidaksü aser federating units o subordinate bodies ajak nungi teshimtet nübotemi September 17 nikongdang 3:00 ako tashi nung atongtsüla, ta NSF Speaker Kashung-isa metetdaksü.

## Covid-19 wara tasembuba mapang tanurtem kümdangtsüla

**Mumbai, August 30, 2021 (Agencies):** Mumbai nung health tsütsü mongin nisungtemi Covid-19 wara tasembuba mapang tanurtem dak kanga kongshitsü ta metetdaksüogo.

Tanurtemi Covid inyakym mebenshiba ajanga parnok tsingda kanga menatepa aotsü akok, ta mongin nisung kari ashir.

Ajisüaka ano nisung karibo ibaji tebilemsü masü saka temang nung tashidak aliba tanurtem dak ang shirang tuluba adoktsü lendong lir ta metetdaksüogo.

India nung academic session tasen atema school tem lapoker aser parnok vaccine magii offline class tenzükba ajanga Covid menatsü ana nung lir.

Covid-19 indang delta variant kanga zübazüba menatepba ajanga taküm July nungi tanur aika dak Covid-19 putetogo.

Tawa tu Mumbai nung boarding school ka shibanga liasü. Iba school nung kaketshirtem densema nisung 22 dak Covid putet.

"Iba ya Covid inyakym sülen manidakba ajanga lir. Tesyurtem, kaketshirtem mesüra public süang Covid inyakym benshitsüla. Delta mesüra delta plus variant süang, anaprongi virus belenshir" ta KEM Hospital dean Dr Hemant Deshmukh-i ashi.

"School mesüra orphanage nung tanurtem külemi mejanger aser achiajem asür. Tanurtem nem vaccine magütsü anungji parnoki melamela menatsü. Ano parnok den yaritepertemi Covid inyakym benshitsüla aser vaccine agütsüla" ta Dr Deshmukh-isa ashi.

"Covid putetba sülen mozü kitem nung anepaluba tanurtem rongnungi 60% nungi 70% tashi dak tanga tashidak mesüra immune system tashimait liasü" ta Ministry of Health and Family Welfare-i metetdaksüogo.

Tanurtem dak MIS-C (multi-system inflammatory syndrome) adoker aser iba ya Covid nungi taneptsü anguba sülen adokba tashidak ka lir saka kangabo madoker.

## Tanü Assam nung 'Chakka Bandh' alitsü

**Guwahati, August 30, 2021 (Agencies):** Assam Motor Shramik Joint-Federation (AAMSJF)-i August 31, 2021 nü state ajungalen ghonda 24 'chakka bandh' alitsü ayongzükogo.

Dima Hasao kübok Doyangmukh nung truck driver pungu tepsetba anema parnoki lungkak aittsü.

August 31 anepdang 5:00 ako nungi tenzük September 1, 2021 tashi 'chakka bandh' alitsü.

AAMSJF-i Assam sorkar dang

tasür kibong shia nem Rs 15,00,000 teyari agütsüsü ayongzükogo. Parnokisa sorkar dang driver tem asoshi security meshiogo.

"Dimasa National Liberation Army (DNLA)-i iba ama mapa tamajung inyakba aitsür. Iba ama mapa inyakba ajanga shingai alizüing metongtetsü" ta AAMSJF President Krishna Borah-i ashi.

"Tai maketba nisungtem tepsetba ajanga telungpur teloktem loktiliba nung densemsü makok" ta Borah-isa metetdaksü.

## Nagaland nung tetsür aser tanur dak tashiyim mapa inyakba ajemtsü School aser college nung 'Police Ke Pathshala' sentong tenzüksü

**Kohima, August 30, 2021 (TYO):** 2030 küm tashi nung Nagaland sorkari tetsürtem aser tanurtem dak tashiyim mapa inyakba ajemdaksütsü asoshi alizüing yua lir. Iba ya Nagaland SDG Vision 2030 document nung shia lir.

2030 küm tashi nung sorkari tashiyim mapa inyakba aser nisung asüba ajemdaksütsü aser ajak nem kasa temeten agütsüsü alizüing ayur.

2019 küm ken o 1,802 tashi benokba nung tetsür dak tashiyim mapa inyakba ken o 86 dang liasü aser ibaji ken o ajak nungi 4.7% lir ta Nagaland Home Affairs Department-i agütsüba osang Vision Document nung shia lir.

Kasa mapang tanurtem dak tashiyim mapa inyakba ken o 50 benok aser nisung tepsetba ken o 23 liasü.

Iba atema state sorkari 2030 tashi nung tetsürtem dak tashiyim mapa inyakba 2% tashi ajema kümdaksütsü nükjidong lir.

Sorkarisa nütsüng yongsük 1,00,000 shia tanurtem dak tashiyim mapa inyakba 0.16% ajema kümdaksütsü aser nisung tepsetba den ochimashi maparen ajemdaksütsü nükjidong ayur, ta Vision Document nungsa shia lir.

Vision Document ajanga fast-track courts aser e-courts ajanga tekaratiba nung temeten agütsüsü shia lir.

Item dak alia temeten agütsüba inyakym tajungba kümdaksütsü asoshi Lok Adalat system tashi itdaksütsü aser para legal volunteers (PLVs) nem shisatsü talila agütsüsü, ta Vision Document nungsa shia lir.

Nagaland Police-ia state nung aliba higher secondary schools aser colleges ajak nung Police Ke Pathshala lapoktsü aser police ketdangsurtemi school tem sema kaketshir nem tesayuba balala agütsüsü.

Police ketdangsurtemi presentations agütsüsü, kaketshirtem den sensaksentsü, essay tetoktepba ayonga agütsü aser printed materials lema agütsüsü. Ketdangsurtemisa police department inyakym meteta lidaksütsü atema tesayur aser kaketshir jaoktsü.

Nagaland sorkari STF tajungba kümdaksütsü aser parnok nem specialised training agütsüba den police asoshi e-patrol system tenzüksü.

Temeten agütsüba maparen nung tetsürtem nem shilem tuluba agidaksütsü aser police o legal

system nung tetsürtem asoshi lenmang sadema lapoktsütsü, ta Vision Document nungsa shia lir.

Inyakym zübadaksütsü atema e-First Information Report (e-FIR) tenzüksü. Iba digital platform ya traffic senchi, lost report osang agütsüsü, complaint status reprangtsü, mobile phones samaba osang agütsüsü, police clearance certificates angütsü aser tenant/domestic help verification amala inyakym den sendakteptsü.

Nagaland state sorkarisa 2030 küm tashi nung e-Courts Programme tenzüksü.

Electronic court tetezüji obendangertem lia aser technical infrastructure tajung nung ozüing dak sendakba maparen inyakba dang ajar. Technology amshia aser sen aika meindoki e-courts ajanga ken o tem angadanga bentetsü. Iba ajanga okadak aser sensotem ajangzüksü, ta Vision Document nung shia lir.

India sorkaria iba mapa ya linük ajungalen inyaktsü meranger anungji Nagaland state sorkari tekaratiba nung e-Courts tenzüksü kechiyong iba ajanga senotsü aika endokba nungi kümjüksü, ta document nungsa shia lir.

## Mahila Morcha Nagaland Unit-i jangjashitsür

**Dimapur, August 30, 2021 (TYO):** Naga tsür kari India sepaitem dak rakhi mesüloksüba atema ashishitep onük ka adokba sülen BJP Mahila Morcha Nagaland Unit-i iba atema osang jangjatsüogo.

"Aienla Jamir ya National Secretary lir aser national leader ka ama la senden aser sentong aika nung adentsü jaoker. Iba amaji la jaokba tesemtemi aodang, idakji alirtem tamang aser sobaliba akhümtsübuu sayutsüsa akümer, kechiyong secular aser democratic linük ka nung yamaji inyaktsü imlar" ta Media Cell, BJP Mahila Morcha Nagaland Unit-i sangdong

ka nung metetdaksü.

Central lennirtemi Nagaland semdangi arudang political party ka ama onoki asen tamangba yimsü aser sobaliba nung ajemdaker sentongtem ayonger aser ajaki shilem agir, ta parnokisa ashi.

"Meimchir temeten alema inyakshiba aitsür aser AFSPA atema onoki tebilemsü abener, ajisüaka Raksha Bandhan sentong ajanga AFSPA pusema menungiter" ta BJP Mahila Morcha Nagaland Unit-isa ashi.

Aienla Jamir-i agarbatti amer agiba noksa ka social media nung prokshiba atema BJP Mahila Morcha-isa ashiba agi "Bokajan,

Assam nung senden ka nung adentsü jaokdang taoba mapang nungi parnoki inyaka aruba ama Aienla-i party tenzükertem nem akhüm tetushi agütsüba liasü."

"Item tatalokba atema nübotemi tebilemsü lemsatepba atema pelar aser onoki maneni tajungtiba nung inyaka aotsü merangtsü" ta Mahila Morcha Nagaland Unit-i metetdaksüogo.

Nagaland kübok Dimapur aser Manipur kübok Tamenglong nung Naga tsürtemi Indian armed forces nem rakhi mesüloksüba atema Naga Mothers' Association (NMA) aser Global Naga Forum (GNF)-i ashishitepa liasü.

## Assam tzümetsüng nung nisung 2 asü; Tensa tamajungba kümogo



nisung 3, 63,135 nungi 1, 30,001-i pei pei talidak toktsür aotsüsa kümogo.

Taküm tzümetsüng timtem ajanga Assam nung ali hectare 30,333.36 nung tsünüsenbongtsü raksaogo aser kiset shiruru 2,56,144 dak kongsia lir, ta ASDMA-isa metetdaksü.

Külen, Kaziranga National Park aser Pobitora Wildlife Sanctuary nung güntok aliba tesemtem nung tzümetsüng timtem ajurua lir, ta Assam State Forest Department-ia metetdaksü.

"KNP nung 70% tashi tzü agi metsüingbanga lir aser anti-poaching camp 223 nungi 125 tashi metsüingbangogo, saka taoba ghonda ishika tsüingda water level ajema kümogo" ta Kaziranga Director P. Sivakumar-ia ashi.

**Guwahati, August 30, 2021 (Agencies):** Hombarnü Assam nung tzümetsüng tensa tamajungba kümogo kechiyong tanü nisung 2 asü aser district 21 nung nisung lakh 3.63 den tema timtemer.

"Barpeta aser Morigaon

district shia nung nisung kaka asü. Tenaprong tzümetsüng agi ponger ao" ta Assam State Disaster Management Authority (ASDMA)-i metetdaksü.

Assam nung tzümetsüng agi tamajungtiba kongshiba district ji Lakhimpur lir. Iba district nung

Office of the  
**MONGSEN RIONGSANGER PUTU MENDEN (COUNCIL)**  
Mokokchung Village  
**SANGDONGER**

Mokokchung Yim Mongsen lima Sungkumshi nung Angour kidongbo lir, saka Terasangba Kichu kidongbo mali ta metetdaksür.

Mongsen Rionsanger Putu Menden :

1. J.Temjen Tatar
2. P.Toshimeren Tatar
3. S.Atemwapang Tatar

## Zeliangrong Baudi ajanga NH129A lenmang yangluba semdang



**Kohima, Luroi/August 30 (TYO):** Zeliangrong Baudi, Nagaland ajanga Tepuiki Bridge nungi Peletkie junction tashi Package (17.2 km) National Highway 129A Dimapur-Maram Road yangluba semdanga liasü.

Zeliangrong Baudi, Nagaland indang sangdong ka

ajanga ashiba agi, lenmang yangluba maparen ya temolung süa kera meinyaker ta ajiteta contractor den sensaksemba mapang lemsatep aser mapang shidak nung mapa tajungtiba nung tembanga inyaksü ajungshia liasü.

Tang tzunglu aruba mapang ka asünung, maparen inyakba

nung tetsükdaktsü jenti ajurur, ta parnoki angateta liasü.

Ajisüaka mongpu tenzüka mapang contractor temi iba project nung temolung agüja mapa inyaksüla, ta ashi.

NHIDCL den külemi mapa inyakba asadangtsü asoshi volunteer tem yoktsü, ta ZBN ajanga shia liasü.

## Rising People's Party ajanga tesem balala semdanga jaja

**Dimapur, Luroi/August 30 (TYO):** Nagaland tesem ajunga sema jajaba sentong nung shilem ka ama Rising People's Party tir Joel Naga-i anir Dimapur district kübok Zani yimtsüing July 31, 2021 nü semdang, Wokha aser Tseminyu jila August 28, 2021 nü semdanga nüburtem nem Rising People's Party indang nükjidong angatedaktsü aser nüburtem nem tang state nung meshidaki yimsü asüba indang awareness agüja liasü.

RPP-i Zani yimtsüing semdangba mapang Chakesang Riders Club ajanga meina liasü.

Iba mapang yimtsüing pongu indang lenmang committee, Vechizo Dozo-i nüburtem tejashi lemsatep aser lenmang majungba ajanga timtem balala ajuruba shia liasü. Sorkari iba lenmang ya küm 50 tashi senzüka yuja arur, koba New

Naga Cemetery lenmang densema lir, ta ashi.

Yimtsüing lenirtemi RPP dang lenmang majungba indang ya ketdangsur nem metetdaktsü mepishia liasü.

Wokha jila aser Tseminyu jila nunga nüburtem den sensaksemba sentong ya August 28, 2021 nü agia liasü, kong RPP nungi züngsem 20 tashi oa tesem anaprong nung temolung süa sensaksemba liasü.

RPP ajanga par nukla aser tangatetba lemsatepba sülen senden nung adener den tang yimtenren aser temelenshi nüngdakba, Khristanpur yimya aser jenjang, election masüngtetba amala onüktem jembia liasü.

Senden nung shilem agirtemia RPP dang par manifesto nung aliba ama ochishia alitsü aser Tsüngrem

nem len anidaktsü ayongzüka liasü.

Iba sülen RPP züngsemtem ya Tseminyu jilai oa, yangji tangateter, entrepreneurs, aluyimer, teintet rogo, tetsürtem aser lanurtem den sensaksem kaa liasü.

Iba mapang party lenirtemi RPP ya political party mesüra yimten yimsüsür kata anema masü saka tang sorkar meshidaki aniba anema nokdaker, ta angatetdaktsü.

RPP lenirtemi movement ka nüngdaker, ta ashi aser iba movement nung RPP ama Tsüngrem tiyong südaktsüla, ta ashi.

Nüji, democracy, yimya tajung, tetsür temeden, terenlok, rongsenketzung peria aliba aser terenlok akaba Nagaland nüngdak, ta senden nung jembia liasü.

## African Swine Fever mechi Mizoram nung sen crore 121 akoksa

**Aizawl, Luroi/August 30 (Agencies):** Tang district 11 nung African Swine Fever poktetba ajanga yimtsüing mesüra tesem 239 nung kongshia rongsen tsütsü sen crore 121.49 akoksa, ta Dr Lalmingthanga, Joint Director (Livestock Health), State Animal Husbandry and Veterinary Sciences Department, Government of Mizoram ajanga sangdong ka nung ashi.

Iba virus tashidak ya talila prokshia aoba nungi nokdangtsü mechi ak 9,458 tepsetogo.

Deobarnü ak 130 asüba ajanga tang tashinung ak asüba ajak agi 25,256 alitsü, anungji sen crore 88.39 akoksar.

Lalmingthanga-i ashiba agi, Mizoram kübok district 11 nungi Aizawl nung tamajungtiba kongshi, kong ak 10,766 süogo

aser iba sülen Lunglei lir, kong ak 4,129 asü aser Serchhip nung 3,490 asü.

Myanmar, Bangladesh aser Meghalaya amala kidanger linük aser state tem nungi ak mesüra akshi bener aruba ajanga African Swine Fever ya tenzüka alitsü südi, ta amanger.

African Swine Fever ajanga nisung dak timtem magütsür aser ak dak nungi nisung dak iba tashidak ya mamemar, ta mongintemi ashir.

Mizoram nung African Swine Fever ya mezüngbuba Lunglei district south tsütsü Lungsen yimtsüing nung March 21 nü jangjateta liasü, koba Bangladesh arütsü anasa lir. Iba sülen April ita tiyonglen ak ya African Swine Fever agi asü, ta Bhopal nung aliba National Institute of High Security Animal Diseases ajanga jangjatsü.

## Assam Police-i Manipur nunger mozü shibelener pezü apu



**Guwahati, Luroi/August 30 (Agencies):** Osang kar nung ajemdaker Assam Police-i Sonapur tesem nungi heroin seret 1.324 pua liasü.

CP, Partha Sarathi Mahanta-i anir Guwahati Police Special Squad ajanga sabor cases 100 nung iba temesepba mozü ya nguteta liasü, koba Moreh nungi Churhandpur tashi tsüingsü pua arur Sonapur nung apu.

Police ajanga sangdong ka nung ashiba agi, kanga tekolok ita item talep ya gari tejaklen dashboard aser tesülen tail lights nung miima yua liasü. Item temesepba mozü ya gari nungi mechanics takotet temi ang lapoker agiteta liasü.

Iba dak sendakba nung

nisung pezü apu - arishi küm 34 tain Khaiminlal Touthang, arishi küm 37 tain Seiminthang Mate, arishi küm 30 tain Paominthang Lhanghal aser arishi küm 35 tain Kailalson Khongsai. Par pezüprong ya Manipur nungi lir.

Pua aliba temesepba mozü shibelener den asüngdangyaba sülen Special Squad ajanga idangjisa Guwahati yimti nung operation ka agia iba oset agizüktsü alir nisung ana pua liasü. Tena ya arishi küm 51 tain Lulun Kuki aser arishi küm 56 tain Kamkhajim ta jangjaogo aser tena ya Manipur nungi alitsü.

Iba dak sendakba nung bushisüngdang ka tenzüko, ta osang ajanga ashi.

## NBSE ajanga 'Shikshak Parv 2021' ayongzüksü metetdaktsü

**Dimapur, Luroi/August 30 (TYO):** India nunger nüjiso ngur küm 75 ajungba bilemteta amungba 'Azadi Ka Amrit Mahotsav' sentong nung shilem ka ama Nagaland Board of Secondary Education (NBSE) ajanga state nung aliba school ajak dang September 7-17, 2021 anogotem nung 'Shikshak Parv 2021' sentong ayongzüka agitsü totuyuba agütsüogo.

Iba sentong ya virtual mode nung webinars/sensaksepba ka asütsü.

Iba sentong ya "Quality and Sustainable Schools : Learning from Schools in India" omen nung ajemdaker agitsü aser September 7 nü sentong tenzüksü aser September 17 tashi webinars, discussions, presentations amala sentongtem

agiyonga aotsü.

Iba sentong nung linük tesem ajungalen aliba school balala nungi educational practitioners tem jaoka parnoki ajangshiba, angazükba aser lenmang balala lemsateptsü.

Shikshak Parv 2021 nungya 'Promoting Quality and Sustainable Schools'; 'Foundational Literacy and Numeracy: A Pre-requisite to learning and ECCE'; 'Culture of Innovation in our Schools'; 'Nurturing Inclusive Classrooms'; 'Innovative Pedagogy to Promote Enjoyable and Engaging Learning'; 'Technology in Education NDEAR'; 'Transforming the System of Assessment: Holistic Progress Card'; 'Stimulating Indian Knowledge System, Arts

and Culture'; 'Reimagining Vocational Education and Skill Building' amala onüktem nungia sensaksem akatsü.

NBSE, Kohima kübok register süa aliba kakete reju ajak nungi tekolakpur mesüra tesayur kaka shimteta iba webinar/discussion nung adentsü metetdaktsü.

Iba sentong ya Government aser Private School ajanga atema alitsü, ta sangdong ajanga ashi.

Ajisüaka September nungi November 2021 tashi school temi agitsü atema activities ya Activity 'A'; Activity 'B'; aser Activity 'C' ta lemsar agitsü.

Activity 'A' ya September 1-25 tsüngta Class VII nungi XII tashi agitsü. Iba mapang "People who gave us the 75th year of India's Independence"

omen nung ajemdaker Essay/Poem writing/drawing tetoktepsa alitsü.

Activity 'B' ya October 1-25 tsüngta Class X nungi XII tashi agitsü aser iba mapang Reading Comprehension Challenge alitsü. Iba activity nung school temi Indian Freedom Struggle dak sendakba onük nung ajemdaker ojang 300 shi nung zülutepba sentong ayongzüka agitsü. Item onük nungya Indian Freedom Movement nung North East India nungi shilem agiba adentsü akok.

Activity 'C' nung Class XII nungi kisüing shilem agitsü. Iba sentong nung India nunger 2047 küm tashi nukla indang nung kaketshirtemi Essay/Poem writing/Drawing tetoktepsa alitsü.

District shia nungi activity

shia tajungtiba asem nem Certificate of Merit agütsütsü.

Activities ya agiba sülen kaketshirtemi agütsüba entries ya school temi screen sür school shia nungi tajungtiba ka Word Format nung collessay21@gmail.com dangi mail asütsüla.

Board ajangasa school ajak dang kaketshir tenüing, class aser school tenüing jangja-jangja zülur agütsütsü metetdaktsü.

Category nung shia aliba ama Class VII nungi XII tashi kaketshir den item activities ya agitsü asoshi register süa aliba Heads of Institutions nem metetdaktsüogo.

Kasa mapang NBSE ajangasa iba sentong nung kaketshirtem shilem agitsü asoshi ajungshitsü ashi.

# Manipur aser Assam tsüingda tanaben train service tenzükogo



**Imphal, August 30, 2021 (Agencies):** Manipur nung alir nübür nem rail connectivity tajungba agütsütsü atema Manipur chief minister N Biren Singh aser Union minister of state for Railways Raosaheb Patil Danve nati passenger train service ka tenzüktsüogoo.

Mapang talangka nungi nübürtemi yonya aruba sülen Deobarnü Manipur kübok Jiribam aser Assam kübok Silchar tsüingda iba passenger train service tenzükja liasü.

Imphal nungi video link ajanga passenger train service tenzüktsüba sentong agi. Iba sentong nung Manipur sorkar aser Railways nungi ketdangsurtem den State ministers, MPs aser MLA tem denogo.

Manipur chief minister Singh-i, State nung alir nübürtem ajangzüktsü asoshi railway tsütsü terenlok lidaktsütsü asoshi tejangraba lemsatopogo.

"Linük nung tesem balalai tashi senzüsönbongsü atema, iba train (05659/05660) ajanga Manipur nung alir nübürtem mangdang ataloktsütsü" ta MoS for Railways, Coal & Mine, Raosaheb Patil Danve-ia ashi.

Tarutsü mapang Manipur nung railway wadang tsütsü terenlok lidaktsütsü asoshi

Danve aser N Biren Singh na sensaksemogoo.

Hombar aser Brehostibar shia, anepdang 7:00 ako nungi Train no. 05659 ya Silchar nungi ayamesotsü aser 8:55 am meta Jiribam atongtsü.

Silchar nungi Imphal indang passenger tem ayong ayonga senzüsönbongsü atema train senzütsü anogo aser mapang latettsüogoo.

Iba train nung, general class compartment 8 aser luggage-cum-guard vans 2 dena lir. Jiribam aser Silchar tsüingda station 7 tashi nung anena iba train senzütsü.

Train nung senzüsönbonger (passenger) tem aika maliba aser Covid-19 wara ajanga June 07, 2019 anogo iba train service anenja liasü.

Danve-isa Northeast Frontier Railway indang teinyakdak aliba project tem reprangshia aser asadanga liasü.

Northeast Frontier Railway, General Manager, Anshul Gupta-i NF Railway (Open line) indang maparen aser anogoshia inyakyimtem indang metetpeladaktsü.

Sunil Sharma, General Manager, NFR (Construction) den kisü-jensü achaayangba (construction organization) nungi senior railway

ketdangsurtemi Northeast nung Railway maparen indang project dak sendakba nung osang metetdakja liasü.

Tawa, Jiribam Railway station nung süklep 100 Monumental Flag ka azüingja liasü. Jiribam Railway Station ya Jiribam nung District Headquarters lir.

NFR (Construction) Organization-i sen cr. 12,264.15 shi indoka Jiribam-Imphal New BG railway line projects (110.625 km) yangludat.

Iba project kübok Station ki tasen 8, tongtibang apu 11, apu tila 134, Road Overbridge 4, Road Under Bridge 12 aser metre 71,066 dak tema tunnel tem teyangludak lir. 2023 December tashi nung iba project renemtsü tebilemba lir.

Iba project mapang shitak nung renemtsü asoshi külem sendaktepa alir ajaki anük/tebilemstü balala benoka olemtepogoo.

"Tarutsü nung Myanmar tashi railway connectivity atsülangtsü asoshi, "Act East" policy of the Government of India" mapatong ama iba project mapang shitak nung renemtsü ya kanga dang tongtibang," ta sangdong ka ajanga chief public relations officer (CPRO), NF Railway, Guneet Kaur-i metetdaktsü.

# TMC-i Assam CM Sarma aitsür

**Guwahati, August 30, 2021 (Agencies):** Assam chief minister Himanta Biswa Sarma-i West Bengal chief minister Mamata Banerjee anema "red carpet" olen jembiba Trinamool Congress (TMC)-i aitsüogoo.

"Sarma-i jembiba otemji tamagitsü dang lir. Pa ya 'dal badlu' (party nungi party melenteper) ka lir. Nisung tajung Sarbananda Sonowal nungi pai chief minister melenzük. Tarun Gogoi-i chief minister inyakba atema pai Congress toktsü" ta TMC lennir Saugata Roy-i ashi.

Sarma yimsüsüba kübok Mizoram arrtsülen Assam police khaset aser Dimasa telungpurtemi truck anishirtem tepset, ta Roy-isa ashi.

"Assam nung tensa kanga majung kümogoo. Pai West Bengal atema mejembii par state atema jembitsüla. Assam-i TMC aotsü" ta paisa ashi.

West Bengal chief minister aser Trinamool president Mamata Banerjee-i Assam semdangi arudang 'red carpet' ayutsü molunga lir ta Deobarnü Assam chief minister Sarma-i ashi.

"Lai Assam aser Tripura



Himanta Biswa Sarma (File photo)

semdangba shia onok (BJP) ajangzüktsü. Lai Assam aser Tripura semdangra onok ajangzüktsü kechiyong Congress aser TMC tsüingda votes lemsatsü. Ni red carpet lemer la pelaa agizüktsü" ta Siliguri nung Sarma-i osangbener dang ashi.

"Onoki Assam nung minority votes, Bengali votes aser minority votes angutsü. TMC-i Assam nung takok tajung angutsü imlar" ta TMC lennir Saugata Roy-isa metetdaktsü.

# Mizoram nung tanur 88 dak Covid-19 putet



Tanur ka dak COVID-19 tendangba noksa nung angur.

**Aizawl, August 30, 2021 (Agencies):** Tesüiba ghonda 24 tsüingda Mizoram nung tanur 88 densema nisung 440 dak Covid-19 positive putetogoo aser parnok züingsema nisung 57,962 kümogoo, ta Hombarnü health department ketdangsur kati ashi.

Deobar aonung Aizawl nungi arishi küm 68 tetsür ka iba tashidak agi asü. La densema State nung Covid-19 wara agi asür nisung 213 shi tuogoo.

Mizoram kübok district balala nungi tashidak tasen putet, kong Aizawl nung Covid-19 puteter timtiba liasü. Iba district nung nisung 310 dak Covid-19 putet. Aizawl sülen Mamit district nung 74 aser Kolasib district nung 15 asütsü, ta pai ashi.

Sample 1,948 nungi Covid-19 tashidak tasen putet, kong anogoo ka nung positivity rate ji

22.59% asütsü, ta pai ashi. Tashidak tasen puteter ajak pei pei aliba tesem nung menaa liasü.

Tang, Mizoram nung nisung 8,510 shi iba wara agi shirangdar. Kasa mapang, Deobarnü nisung 271 densema, State nung iba tesashi wara nungi nisung 49,239 shi taneptsü nguogoo.

State nung Covid-19 wara nungi taneptsü angur shilem 84.95% aser tasüba shilem 0.36% asütsü.

Iba wara adoker külen nungi state nung sample lakh 8.47 dak tema Covid 19 atema tendangogoo.

Honibarnü tashi, State nung nisung lakh 6.54 nem vaccine agütsüogoo. Item rongnung nisung lakh 2.35 shi Covid-19 vaccine dose tanabuba agütsüogoo, ta state immunisation officer Dr. Lalzawmi-i metetdaktsü.

# Guwahati nung motorcycle auyar telok tanishisang apu



**Guwahati, August 30, 2021 (Agencies):** East Guwahati Police District nungi telok kati tanü motorcycle auyar telok nung tanishisang puogoo. Pa ya Deep Saikia lir aser 10th Mile Jorabat nung apu.

August 26 nü police-i KTM Duke 250 Motor Cycle ka ngutet aser iba mapang nisung 3 apu.

Par asem dang asüingdangya asüandang angazükba nung ajemdaker police-i August 28 anepdang ano motorcycle 7 ngutet aser nisung 8 apu.

Maneni, August 29 nü police-isa motorcycle 4 talila ngusema liasü.

Iba ken o dak sendakba nung Khetri Police teloki nisung 12 puogoo aser bike 12 ngutetogoo.

Police-i bike auyaba maparen dak sendakba osang talila metettsü atema Deep Saikia dang maneni asüingdangya südar, ta ketdangsur kati ashi.

- Police-i anguba:**  
 KTM Duke 250 (1)  
 TVS Apache RTR (1)  
 TVS (1)  
 Honda Dio Scooty (7)  
 TVS NTORQ Scooty (2)



## TIR YIMYIM YIMOBILEM (EDITORIAL)

DIMAPUR SANGTENNÜ, LUROI(AUGUST) 31, 2021

### Government tajung ka asoshi

**T**ang ya Tsüngremi asenok Nagaland nung alirtem dang kechi aginür (?) ta asüngdang nungbo, mapang magii jet ta ajaki tebang ka nungi adoker ama ola adoka, Government tajung ka aginür ta ashitsü südi ta bilemer. Iba rongdak taginübaji taolen ajak nung election junga aginüba "Clean Election" indang jembiba yagi kuli agütsür. Atangji, Nagaland nung election timi merüka aginüba ya tanü tasen masü, joko mapang talangka Nagaland nung election junga agitsü yongyateper. Election junga aginüba tetezü aser nukjidongji ochishia inyakba Government tajung ka aginür. Iba ama government jagiang kaketreju kanga junga anepalutsü, anungji lanurtem aika sen meindoki kaketshisatsü tajung angutsü aser pei jangraba mapa tebilemsü aser tenokdangba makai tenzüka otettsü. Iba ama government jagiang mozü kitem kanga junga anepalutsü, anungji sen makaba agi mozü ki metongtet, mozü malitet, operation magitet mesüra tanur mesotet shinga masütsü. Iba ama government tajung kodang lidir, kimong lumong yoka bendanglen taneptsü bushia mejajatsü aser sentem tulu nung sen apua tanurtem kaketshidaki yokba tebilemsü malitsü. Kodang asen lima government tajung lidir, gari lenmang dang masü saka tetsüng lenmanga tejajanütsüka tajung asütsü aser light maruba agi tanübo mapa meinyaktet ta asüba anogo malitsü. Kodang government tajung lidir, yimdong nung tashiyim agi sen sarur malitsü aser teyari tajung anguba agi alua teyimnüsüka akümtsü. Idangjiang Nagaland nung lanurtemi sempet, tashitemetet aser tashi amshia rongsen jateta adokdaksütsü. Government tajungi nisungtem tetsübu aser tarendak melii sademsadema pei lima aser nübortem asoshi inyaktetsüsa mapang tajung yanglutsütsü. Government tajung aliba mapangbo sübokrem agi masü aser tejak reprangaa masü saka shiba tetemsü aser shiba tajungba pa mesüra laji mapa nung shimtsü. Idangjibo tiyazü ita sen agirtema malitsü aser mapai mao ita sen agizükba mapatema otsü tejenang ka kümer alitsü. Iba ama government ka asoshi nübortem yongyar. Ajisüaka, iba government tajung kaji tangari agütsütsüa masü aser tangari yanglutsütsüa masü, saka asenoki yanglutsüla. Anungji, government tajung ka yanglutsü atemaji tamasa nübortemji tajung asütsüla. Nübortembo tamajung saka government tajung tabo mesütettsü. Aji oda, US nung taoba tir Thomas Jeffersons-i ashi ama, nübortem shimetba government-ji nübortem dak alangba government asütsü. Aji oda, tanü government tajung aginüba agi election junga agitsü atema arogoi anir "Clean Election" tongpang nung nokdaksü ayongzükba nung ya asenok ajaki pei akok shilem tajung agitsüla, kechiyong asenok ajak arogo nung aser asenok ajak senso tajung kaka lir. Atangji, government tajung ka yanglutsü atemaji 'Clean Election' yimyim aser sentong dang masü saka "Clean Government" yimyim aser sentonga nungdaker. Aiben asenoki Clean election sentong ya election agiba anogo nung atemer amai bilemer, ajisüaka 'Clean Government' yanglutsü asoshibo election agiba anogoji tetenzüker lir. Anungji, election agiang tagi, anogo shia Clean government asoshi jembitsü, inyaktsü aser sarasademsüsbaji arogo nung shia mapa asütsü. Asen lima nung Clean election ajanga Clean government ka meyanglutet tashi asenok pei kidang ayipjanga amui moutettsü. Asen rongsenji tangar rongsen akümtsü aser tetsübu agi alima nung sadema melitettsü. Clean government mali tashi tanurbo tajung saka kaketshisatsü junga mengutet raksatsü, tashidak tilakati tulu küma taneptsü mengutet süadoktsü. Clean government mali tashi temeshir aser tesarur dang ashi, tagütsür aser teyarir malitsü. Tang tashi nunga asenoki itemji peria ajangshio. Joko, asenoka asen lima nung pelatepa, pei akok aser pei jangraba mapa inyakaa azükarua alitsüsa Clean Election dang masü saka 'Clean Government Movement' ka tenzüki aser yangji asenok tama merükteter apusodi.

## OLEMSABANG

### Asenok Naga Nung Asoshi/Atema Yimya Tasen Ka Benshiyonga Aotsüba Ya Kanga Tasak Ta Bilemer

R. Imkong Lkr, Mangimen.

(Yashi adok nungi...)

Tena tu oatoker kelen hajera walla o par tantsü na tu yamai jembitepa liasü, ni kela rodi tu 8 (ti) tang achi, aser naa kwi achi ta par tambo dang asüngdang nung ni kela 10 (ter) tang achi ago ta ashtiang ano khen menütepa liasü. Iba sülen tu ano maneni jembitepa aotang, asen Aortem aser Moyartemi rodi den aoun tajung ya kanga sapuasa chiteper ta bilema ali nung ano Kongyak nung aser Kongyaksür temiang tesapuba timba chiogo na ta menütepa jemmbitepa liasü. Yamaji asen Naga nungertemi chiyungtsü tasen ya kangasa sabua chiteper aser tali tali chiadoker alir, iba jagi tsümartemi asen Naga nungertem ya shiruru den medemdanga kanga menütsür. Saka tsümartemibo rodi ya par chiyungtsü asünungji yangbong ka par yari tang achir, aser temang tu shidak aliba ajanga tashi tait kümdaktsür aser jang seret 100 aiba basta ka tu ayong ayonga bener oteter, saka asen Naga nungertemibo chiyungtsü tajunga ta süra pei temang dak alia achiba ajanga pei temang aser tebok tu ulur kümdaktsür, iba jagi tebok tuang makokerji jang seret 50 aiba basta ka tu kangshia tang bener oteter, iba jagi tsümartemi asen Naga nungertem ya tashi mait ama repranger, saka aseni tang chiyung shia chiyungerbo tsümartem dang nungibo asen Naga nungertemi ang oset tsüset tuluba, taretba akoktsübaji tashi lir nung ta sasasetasa bilemetsür.

Asenoki jungjunga bilemdangyong ora asenoki chiyung mashiba ajanga kar balaka kangrang pok ama moraa or aika angur aser oda odabo item rogoji tashidak tulu adoka sükmani aotsüsa akümer aser tia mekara tasüa süa toktsü menua mali, aser aika iba tia nungji lia asü limai oadokogo. Saka tsümartemibo par chiyungtsü tu tataket ka chiyunger aser temang junga ali nungji mapa tasak süala, temela süale ayong ayonga inyakba angur. Taoba mapangbo asen Naga nungertem ya mapa kanga meranga inyaka aru ta otsü nungbo angashir, tanüa asenoki tang tali shirbo kasaji inyaktsü koka lir. Tanü asen nisungtem aikati khen agi tebilemdang mekai tali tali chiyongteper aser oset chiyungtsü tasen rodi amala yabo jenjang mekai anguba chiyungtsü ka ama chitepba angudang tsümartemi aseno Naga nung songjen ya shirurtem den kangabo mepila aser chiyungtsü nung advance ashe, tukulok aser shisatsü nungbo kangasa backward ta parnok o parnok na jembitepba par oshi terara angatetertemi angazüka arudagi. Aser ano tsümartem shirnok asen lima nung lidagi, parnok jagi asen Naga nungertem dang saab aser mimsahib ta ajaba ya kangasa anganerji, yamajisa jadaktsüdang tanemi tang asenokji par nem anishidaktsür. Tanü asenok Naga nungertem aser takartemi ki tala ka asüdang sen lakhs 50 ag irenemtettsüba tu crore ka mesüra tali agiang renemtetbaji khen jung junga bilemdangtsü mapang agi tongja dongogo ta shidanger. Kechiba ta süra tsümartemi aser Naga nungertem kulok shisatsü ya yaktsü metetadoker alir, iba jagi parnok asenok dang saab aser mimsahib jaa sen nungbo parnok kibur akümer. Parnoki asen tang nung iaatetba senji par limai bener oatoker aser par lima nungbo sen ishika agi ki tululu sütetet ta asen tang odi odia ashiba asenok aikati angashir alirtsü ta amanger. Aser yangji par lima nungbo asen chirtem company tilala nung inyaktertem aser technical tsütsü training agirtem aser college azüngertem ki para tala ka nung Rs. 10,000 nungi Rs. 15,000 tashi nung litepertem ali nungji parnokiang tajungba meteta alitsü ta amanger aser par nisungtemdangji saab ta ajatsübaji ola junga madokteter, saka parnok tu tsüngrem ama tang liteper ta angazüker. Iba dakji alaka asen lima nungi sen aa bener aoba jagi parnok chirtem tu karbo IAS officer tashi kümdakja tulur kümdaktsür, yamaji asen lima nung ayanger chirtemji tulur aikasa lir ta parnok iashiba angashia arudagi. Saka asen lima nung mapa inyaktertem ya tulurtemi parnok mapa inyakdaksütsü mechi nung inner line permit tu mapang medongjungi yanglutsür atar, aser parnok tu senso tajung ka ama jangratema lidaktsür. Yamaji parnok rongnung karbo küm 10 tashi mesüra küm 15, 20 tashia par limai moi chirnur, kinungtsü doktsür asen liman ung litetbaji odangbo masü ta angatettsüla. Kechiba ta süra parnok ya asenlima nung jangratema tajangzük tulu ngua aliba ajanga par lima tu bushtisü mebilemer ta angateter, saka parnok jagi senbo mapang shia par limai bener yoker. Saka asen nisungtembo asen lima nung ayangdak maka kanga timtemtepa ngua arudagi, saka tanü asen chirtem BA Graduate aser MA degree ngur aikasa mapa menugi lir, parnok ya company amala nung mapa tilalabo angur, saka tebok masüngerji aikati mapa tamajung nunga pongoksema senzüteper. Saka asen chirtem aikati tazünga degree tulu liaka mechiyungi alitsü masüji ta ser kanga merangtepa tsümartem den toktepa mapa aika nung inyaka aoba angur, item amala lanurtem angudang kangasa pelasete repranger. Tarutsü mapangtem nungbo parnok yagiang tsümartem ya melentsü, kechiba ta süra tanü tsümartem yabo par tashi yari meranga inyaktsüba dak alaka tazünga temetetbabo mali, saka tanü asen chirtem lanurtem yabo ajak nung ajak ta reprangteter, parnok jembiteter aser züluteter aser parnok ajak ya computer metetba aser tangatetba shisatsü peria aliba lanurtem ta tulurtemi metettsüla, tanü tulurtem ya asüngbo jenjang kangabo makatsü tasa repranger aser aji asangsang nung ataloka aotsü mapang arudagi.

Tanübo tulurtem aser takartemi tsümartem dak tang temulung kanga alemem asünungji parnok office-i or kelen mesüra takartem pei mapai or altiang parnok meimsahibtemi tsümartem den külemi pei ki yanglutang parnok jukale tu kümer kanga meranga temulung agüja rodi chitepa inyaktepdang kinungtsü aser kinungbo mesüka inyakteperji tsümartemi kangsa pelar, iba jagi pei lima nung chirnurtem aser kinungtsü to amadoker kümsa küm asen lima nung lirepa tsüka litetbaji tesüngmangtsüka tasa bilemetsür.

**Yangi meteta alitsü atema ojang ka ana melenshia agütsür:-**

1. Asen Ao oshi nung aikati "she" ta ajatsü melena shi ta amshibaji tai lir.
2. Aser ano Hajera walla ya tsümar oshi asünungji Ayangi Aosang mesüra Aola ta amshi nung tapetba asütsü.
3. Aser ano aikati tsümar osh inung "joka" "kitchen" English oshi, iba melenaji "Atepzüng" ta amshi nung tapetba asütsü. Mezüng yongi item ojangtem ya asen Ao oshi tetenzük nungi lir.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerü angateta agitsü mepishir**

## Chhattisgarh nung Hindu nunger telok kati Tenla ki amak



August 29, 2021 nü Chhattisgarh state kübok Kabirdhan nung Hindu nunger telok kati Tenla ki ka amakba sülen tangokba noksa nung angur.

**August 30, 2021:** August 29, 2021 nü Chhattisgarh state kübok Kabirdhan nung Hindu nunger telok kati Tenla ki ka amak; tesüiba hopta ka tsüingda state nung Khristantem anema inyakba tatalokba trok liasü saka state sorkari aibelenertem anema kecha meinyaker, ta Hombarnü Khristan lenir kati metetdaksü.

Amongnü Chhattisgarh nung Kabirdham district kübok Polmi yimdak yim ka nung Khristantem tekülem sentong agiba mapang nung Hindu nunger 100 shi arua pastor dak azük, ta district superintendent of police, Mohit Garg-i metetdaksü.

Hindu nunger telok jagisa Pastor, Kawalsingh Paraste'er kinüngertem dak azük aser Tenla kidang aliba osettsüset raksatsüba sülen ao.

Osangbener den jembidang Chhattisgarh Christian Forum Tir, Arun Pannalal-i, "Tesüiba hopta ka tsüingda Khristantem aiben amakba ya kanga tia

maka. Tesüiba küm ana tsüingda Khristantem anema inyakba tatalokba 200 dak tema lir," ta metetdaksü.

Khristantem anema inyakba tatalokba aika lir, ajisüaka state sorkari aibelenertem anema kecha meinyaker saka aibelenertem aser takoksa angurtem na tsüingda angatettepdaksütsü dang meranger, ta paisa metetdaksü.

"Parnok kar police station-i jaoker saka FIR mebenoker," ta pai ashi.

Police aser sorkari aibelenertem anema kecha meinyakba agi state nung Khristantem tsübur aser loktiliba nung tesünep raksatsür, ta Khristan lenirisa metetdaksü.

"Onoki kuli tejangja agüja Supreme Court nung ken o benoktsü," ta paisa metetdaksü.

Ano külen police-ibo, pastor-i Hindu nungertem Khristan yimsü dangi meyipdaksür, ta Hindu nungertemi ashi, ta metetdaksü.

Osangbener den jembidang Pannalal-i, tawa state nung denominations balala nungi Khristantem Bilaspur jila nung adenshia state nung Khristan lenirtem aser tekülem kitem kümzüka ayutsü atema o lemtepa liasü, ta ashi.

BJP-i yimsüsüba mapang nung Chhattisgarh nung anti-conversion özüng benoka liasü. Chhattisgarh Freedom of Religion (Amendment) Act, 2006 özüng kübok tamangba yimsü melenshinertemi anogo 30 jelia district ketdangsertem dang nungi temelaba meshitsüla, mesüra aibelenertembo jail nung puokba dang masü saka senchi-a achir.

2011 national census report nung, Chhattisgarh nung nütsüing million 23 lir saka nütsüing shilem 1.92 dang Khristantem lir.

Chhattisgarh nütsüing shilem 93 bo Hindu nunger lir aser tanüingba shilem 7 ji Islam, Buddhist, Sikh, Jainism aser Khristan yimsü amangertem lir.

## Ida yipru lendong atalokba sülen Arogotemi timtemertem yarir

**August 30, 2021:** Amongnü nikonngang Louisiana tzüyimkümlen 'Ida' ta ajaba yipru mopung tesashi ajanga Louisiana aser New Orleans kongshiba sülen Arogotemi iba yipru agi kongshirtem nem tejenokdak agütsüba den teyari balala agütsüdar, ta osang ka ajanga metetdaksü.

Salvation Army USA-i nüburtem dang iba yipru agi kongshirtem yaritsü atema tenla agüjang, ta mepishia metetdaksüogo.

"Ida yipru agi kongshirtem yaritsü atema Salvation Army renema lir. Yipru lendong matalokdangyongi onok renema liasü aser maneni iba tensa mesüingjem tashi onoki inyaktsü," ta parnoki sangdong ka ajanga metetdaksü.

US nung Catholic Arogo kübok domestic relief agency-Catholic Charities USA (CCUSA)-ia iba yipru agi

kongshirtem jenokdaksütsü, chiyungtsü agütsütsü aser kiojen yanglushiba nung yariteptsü renemogo.

Iba dak alia anasa aliba Arogotemia iba yipru agi kongshirtem jenokdaksüba den külemi teyari balala agütsüdar.

Nüingtugu sayutsüingir, Joel Osteen indang Lakewood Arogo-ia iba yipru agi kongshirtem yaritsü atema anogo ananü tenla benden tenzüko.

Iba yipru agi kongshirtem Arogoi jenokdaksütsü, ta Osteen-i metetdaksü.

"New Orleans aser Louisiana nungi arurtem yaritsü atema onok renemdar. Parnoki tejenokdak nüingdakra Lakewood Arogoi pelaa agizüktsü. Onoki akokba tashi nisung aika agizüka jenokdaksütsü," ta paisa metetdaksü.

Lakewood Arogo nung Relief & Emergency

Management Executive Director, Matt Osteen-i, "Onoki tzü bottle, diapers aser baby wipes densema nüingdak oset balala bendentsü. Lakewood-i partner Arogotem den longjemer tesem aika nung teyari agütsütsü," ta metetdaksü.

Hurricane Katrina lendong atalokba sülen küm 16 ajungba mapang nung Ida yipru lendong atalokogo. 2006 küm August ita tatembanglen New Orleans nung Katrina yipru lendong nung nisung 1,800 dak tema asü.

Taoba mapang US tatong Tir, Mike Pence-ia "Kü kinüingtsü künati Afghanistan nung asür kibongtem nem tesünep agüjang aser iba linük nung asen sepaitem kümzüka ta sarasademtsüba den külemi Hurricane Ida agi kongshirtem atema sarasademtsür," ta metetdaksü.

## ANO GO ABEN TSÜNGREM DEN

### Temeshiba metsü prokba

*Saka temeshiba prokeri chichiba sempet angur.*

*A. Shin 11:18b*

Asenok taküm kümzüka alitsü leman aika lir saka temeshiba asoshi asenok sasa bendanga agütsüba nung sempet tulu agütsüba danga leman kecha nunga mali. Asenok jenjang ajak Tsüngrem temeshiba sayutsüla aji tekümtet ajanga asenok meyong lir: asenok tebilemba temeshiba asoshi bilemba asütsüla, idangji asenoki kechi bilemer aji Tsüngrem chir asoshi mapet masütsü; asenok mapa, idangji asen takümi temeshiba Tsüngrem ka tenzüker ta kuli asütsü; asenok tsüingchiba, idangji asenok tesendaktep ajak nung shingai mashishitsü.

Ne taküm nung nai Tsüngrem temeshiba sayur asü? Temeshibaji nai ne taküm nung mapa inyaktsü melaba lir. Temeshiba bilemba metsü proktsü melen, nai tebilemba nung tamajungba aser temenen tebilemba indaktsür asü? Nai shi jangraba menokdangi mesüra tatok magütsütetba ne taküm nung lidaktsür asü? Yisui ashi asenok Tsüngrem aser Pa temeshiba tema bushira Pai bendenloktsütsü (Matt. 6:33).

Temeshiba metsü prokba nung sempet tulu lir. Tang nai ne taküm nung metsü proktsü sentong lir? (1 Peter 1:15). Ne tebilemba temeshi asütsü asoshi nai ne kolok nung temeshiba koda ayur? Na tsüingchir süa alitsü asoshi ne tesendaktep nung temeshiba koda arur? Asüing nai ne taküm nung temeshiba aluruba kanüra, tanü nai temeshiba metsü azüingtsüla.

## Khristan Charities-i Afghan nunger Khristantem yaritsü mepishir

**August 30, 2021:** taküm lendong nung lir," ta Afghanistan yimtiba, Kabul metetdaksü.

nung aliba airport nungi Hokolbarnü (August 27) bendangertem aser Afghan Khristan putir pezüi UK sorkar nunger tayimtsü ajanga dang lendong nung aliba anitetba mapang tembanga Afghan nunger kümzüka arudang Afghan nunger mapa manentsüla, ta Khristantem atema teimla mepishio.

International Christian Conference of England & Concern (ICC)-i ashiba agi, Wales nungi putir pezü- Rev. Afghanistan nung Khristan Paul McAleenan, Dr John nütsüing 10,000-12,000 shi dang Perumbalath, Rev. Christopher Chessun aser Rev. Paul Butler lir.

Taliban teloki Afghanistan nungeri sorkar dang Afghan yimsüsü tenzüka sülen tensa atema maneni inyaktsü Khristan lenir kati Khristantem mepishi.

dang pei kidang nungi "Onoki British sorkar dang mayazüktsü tekümdangtsü lendong nung aliba Afghan metetdakja liasü. nungertem aser meimchir temeden atema inyakertem

UK nung aliba Release kümzüka jenokdaksütsü International telok nung chief atema maneni inyaktsü executive, Paul Robinson-i, mepishir," ta putirtemi shidi ka "Onok dangi call asür Khristan aikati tensa junga lir ama ajanga metetdaksü.

jembir, saka Khristan karibo "Onok Arogotemi kanga tsübur. Parnoki linük Afghanistan aser alima tesem toktsür aotsü atema lenmanng balala nungi arur refugee tem bushir," ta metetdaksü. junga agizükba onoki nguogo. Phone ajanga Release Linük ka ama asenoki International den jembidang timtemertem agizüktsü atema Khristan kati, "Küm ka tejaklen nisung telatet ka mayutsüla, ni Khrista agizüka liasü. Tang saka nüingdak apir aika Kabul nung tensa kanga agizüktsüla," ta parnokisa mejungi kümogo. Ozü jala küna metetdaksü.

**OLONG PAITEP # 5922**

	1			2		3		4
5						6		
7		8						
						9		
		10						
11								12
					13			
					14			
15								
					16			

**TIPIEN**

- 1. Balaka
- 6. Aika shirangba
- 7. Tar tatsü
- 9. Nenü'er jabaso
- 10. Sen latettsüba
- 11. Tangar kübok alir
- 14. Lon nung inokba
- 15. Tzü ayimdak
- 16. Ajok

**LANGTSÜNGLEN**

- 2. Hai sür inyak
- 3. Aor tenüng ka
- 4. Ali telungi talangka lur
- 5. Tebang kenyongi mazüoker
- 8. Ken atema anenzükertem
- 9. Toktepa noktak
- 10. Sen
- 11. Benjong agi
- 12. Telung nung rizünga ayu
- 13. Tebang nung enok

**OLONG PAITEP # 5921 TELANGZÜBA**

**TIPIEN :**

- 1. Aben, 4. Artsü, 7. Lisem, 8. Liwa,
- 9. Sarasadem, 12. Aket, 14. Mangu,
- 15. Anünü, 16. Ango.

**LANGTSÜNGLEN :**

- 1. Aruli, 3. Balala, 5. Suwar, 6. Belem,
- 9. Sүjak, 10. Aonung, 11. Dokan,
- 13. Tinu.



**TEMETONGSHITSÜR MALIBA SORKAR KA KÜMOGO ???**

- Sobangba** : Hai temba...Onok mazüng memeteterji osang kaket azünger-a masüji osang-tsüsang kecha memeteter...Saka tawa tanü sorkar Department aika nung tulurtemi tiyazü Bill yanglur sen lakh aikasa agizüka achiba osang kaket nung adokba otsü kangasa bulua jembia angashir...Ya shitak jembir asü tiyazü jembir akaa...???
- Alokba** : Waamaa... Temba mi mapo nungbo mokozü madoktsü sudi...???
- Sobangba** : Temba...Surabang ano Opposition maliba sorkar ka yanglur-a ta jembiba ya-a shitak jembir asü koda...???
- Alokba** : Eeeeeessh... O agi jembirba masü yangluadokogo niiii...Tayoker o talir na ajurutepeji jokshishia pela-a agizükogo... Memeshiyongjia Minister-a kabo agütsütsüa ta shiogo.
- Sobangba** : Ayyyaaa...Temba onok mashi-malu nisung asüyongjia tsüba bilembaji...Opposition alidanga tiyazü Bill yanglur sen lakh paika-to achi sura ...Opposition malinungbo ano tiyazü Bill yanglur sen crore kwika achitsü ta tsüba bilemer...Temetongshitsür maliba sorkarji jungdi-ma...???

-Lilir : L.Kika Pongener.

**TANÜBO NAI LANGZÜANG**

Q. Kadavur Reserve Forest ya koba tesem nung lir?

- A. Karur
- B. Tiruchirappalli
- C. Dindigul
- D. None

(Taruba adok nung onoki langzүtsü)

YASHI ADOK TELANGZÜBA : 1940

**AO OSHI ANGAZÜKDAK:**

TANÜ ANGAZÜKTSÜBA OJANG



**Kumesü**

(n) ku tipdema ayutsü atema amshiba oset (comb)  
\* Ku mejepdak **kumesü** meshidok mamshitsüla.

**Kuok**

(v) temulung nung tejashi rema ayuba( harbor bitter thoughts)  
\* Aikati tangari mezüngmeshia jembiba o mamatokteti temulung nung **kuoka** ayur.

**NAI-A YA METETTER MA?**

**SANGKÜM (2022) JULY ITA NUNGI INDIA NUNG TEKÜBOKLEN AGÜJA ALIBA SINNGLE-USE PLASTIC (SUP) OSETTEM NOKDANGTSÜ:**

- 1. Plastic stick agi yangluba Ear buds.
- 2. Balloon atema Plastic stick tem.
- 3. Plastic agi yangluba wako.
- 4. Candy sticks aser ice-cream sticks
- 5. Polystyrene (thermocool)
- 6. Plastic agi yangluba plates, cups aser cutlery talisa forks, spoons, knives, straw, trays.
- 7. Sweet box, invitation card aser cigarette packet tem alepbangba film (plastic tapu)
- 8. Micron '100' dang nungi tajemba agi yangluba Plastic mesüra PVC banner tem.



**SUDOKU # 5963**

5	9					3
	6	4	8			
7	8	2	5		9	
	2		5	7	4	
	5					2
9	7	6	4			
				3	9	2
2	1				8	3
		5	2	6	9	

**TELANGZUBA # 5962**

2	6	1	7	8	5	3	4	9
7	9	4	3	1	2	8	6	5
5	3	8	9	6	4	2	1	7
1	2	3	5	9	7	6	8	4
6	8	9	4	2	1	7	5	3
4	7	5	8	3	6	9	2	1
9	4	6	2	5	3	1	7	8
8	1	7	6	4	9	5	3	2
3	5	2	1	7	8	4	9	6

**OJANG LUTEP # 5508**

- ENKH :
- KNBHEO :
- AIKIJ :
- ASMÜ :
- KASA :
- MENGJLOER :
- AKINY :
- NGANUNG :
- TAKOK :
- URANG :

**OJANG LUTEP TELANGZÜBA # 5507**

NÜBUR AJANGZÜKTSÜ ASOSHI KARIBO PEI MAPANG RONGSEN INDOKBA MESASAI INYAKER

**TAN HOPTA ATEMA - KOMA SÜLA ?**

Q. Tang Nagaland nung parnoki meshiba ama, Mangkolemba, Tseminyu, Shamatore aser Tobu district tasen 4 akümstsü state government-i agizük nunga koma süla ?

Olong 20 shi nung September 03, 2021 tashi nung iba telangzuba ya onok dangi (e-mail - tiryimiyim@gmail.com) :

(SMS - 9856121232 / 9436072422) : (WhatsApp - 7005723372 / 8729995804) : (tiryimiyim.in) ajanga yokang. Telangzubatemi taruba Honibarnü adoktsütsü.



August 30, 2021 nü Nadia district nung aliba vaccination centre ka nung coronavirus vaccine agitsüpurtemi Aadhaar Card sayuba noksa nung angur.

### Tensa balala atema Modi sorkar renema lir: Rajnath Singh

**Chandigarh, Luroi/August 30 (Agencies):** Tang Afghanistan nung tatalokbatem ajanga security dak sendakba tsütsü asenoki tayongzükba ajurur, ta shia Hombarnü Union Defence Minister, Rajnath Singh-i, sorkar renema lir aser Afghanistan tensa nungi maongka agia arrtsülen nungi kiralongraba memelatsü, ta metetdaksü.

Linük security dak sendakba nung Punjab University-i ayongzükba 3buba Balramji Dass Tandon Memorial Lecture sentong nung jembidang Rajnath-i, tensa balala atema Centre sorkar renema dang lir, ta metetdaksü.

"Tang kiyonger linük Afghanistan nung tatalokbatem ajanga security tsütsü

tayongzükba tasen ajurur aser asen sorkari iba linük nung tatalokbatemji mita repringdar," ta metetdaksü. "Yangji tatalokbatem nungi maongka agia linük anemertemi arrtsü adena arua kiralongratsü atema asen sorkari memelatsü. Tebilemtsü onük kar lir aser itemji security tsütsü nungi tayongzükbatem akümtsüa akok," ta pai ashi.

August 15 nü tashi nung Taliban teloki Afghanistan nung tongti yimti aika agi. Tan hopta tetenzüklen Islamic State kiralongrartemi Kabul airport nung bomb pokdaktsüba lendong nung nisung 180 shi poksetba sülen ano tensa tamajungba kumogo.

Rajnath-i, "Narendra Modi-i aniba sorkar kanga kumküma lir

aser tensa ajak atema renema lir. Anünglen, tzüym aser ali nungi amokmeren tensa ajak atema onok mapang ajak nung renema dang lir," ta metetdaksü.

Tanü-asüng technology tasen ajanga amokmeren tasen kar ajangshir, anungji linük security inyakyim ano tajungba akümtsü nüngdak, ta pai ashi.

Taküm kum tetenzüklen Jammu Air Force tation nung nisung mamenba tayimtsü (drone) ka nungi bomb ana tsükdakja pokdaktsüba dak sendakba nung pai iba o ya jemi.

India aser Pakistan na tsüngda melung melemtep lir, anungji iba nungji ajemdaker linük security atema asenoki kanga kumküma alitsü nüngdak, ta pai ashi.

### Punjab nung aluyimertemi lenmang aika mokdanga longkak aiter

**Karnal/Bhatinda, August 30 (Agencies):** Taoba hopta Haryaa kübok Karnal nung aluyimertem longkak aitba mapang Bastara toll plaza nung police-i arrshi kum 45 Haryana nung aluyimer ka dak azükba sülen Honibar aonung asüba anema Punjab tesem ajaklen aluyimertemi lenmang mokdang longkak aitar.

Hombarnü aluyimertemi Karnal subdivisional magistrate, Ayush Sinha tangsa pa menden nungi anendakjang, kechiyong pa tetuyuba nung ajemdaker police-i aluyimertem dak tashiyim amshia azük, ta metetdaksü.

Asür aluyimer kinüngertemi ashiba agi, aluyimertemi toll plaza nung longkak aitba mapang nung police-i tashiyim amshia liasü.

BKU (Charuni) general secretary, Harpal Sudhal-i, Sushil dak aiben azükba ajanga pa temelungjang tashidak atua liasü, ta metetdaksü. Par

kinüngertemi pa tasümgang post mortem agitsü atema matai tasümgangji rongdok.

Ajisüaka Karnal district SP, Ganga Ram Punia-ibo, aluyimer ka asübaji police-i ajok agi azükba agi asüba masü, ta metetdaksüogo.

BKU Ekta Ugrahan general secretary, Sukhdev Singh Kokri Kalan-i, Haryana sorkari tashi tali amshir, aser ibaji police-i longkak aiter aluyimertem dak azükba ajanga kuli sayur, ta ashi.

BKU Ekta Dakaunda president, Buta Singh Burjgill-i, Delhi arrtsülen aluyimertemi ita teku tashi longkak aita timtemer, saka BJP-i ibaji mesükshir, anungji parnoki taa angutsü, ta metetdaksü.

Aluyimertem lenir, Rakesh Tikait-i, "Yirua alirtem timbaka nem treatment junga magütsü. Sorkar tetuyuba nung yirua alir aluyimertem aika nem first aid dang agütsüba sülenbo hospital nungi yokadok," ta metetdaksü.



August 30, 2021 nü Pithoragarh nung tzünglu kanga aruba sülen Jumma yimtak ki ka chirepa aliba noksa nung angur. Iba tesem nung ki aika chirep, nisung ana asü aser aika samaogo.

### Sept mesüra Oct nung Covid wave tasembuba tenzüksü: ICMR

**Pune, August 30 (Agencies):** India nung coronavirus wave tasembubaji September aser October ita na tsüngda tenzüksü ta mongin aikati sangdongogo, aser Hombarnü Indian Council of Medical Research (ICMR)-i, coronavirus wave tasembubaji tanabuba wave dang nungi mesashiba asütsü, ta metetdaksü.

ICMR Epidemiology & Communicable Diseases (ECD) division nung tongti, Dr Samiran Panda-i, linük tesem ajaklen atema shingia coronavirus wave tasembubaji kodang tenzüksüar tejangja

metetzütetsü, ta metetdaksü. "District mesüra state sasep nung data tejangja benden nung ang coronavirus wave tasembuba kodang tenzüksüar tetzütetsü. State temi anojungi tenokdangbatem agienra melamela tenzüksü aser melamela menatepba variant ka lir, aser ibaji ajanga nisung aika dak iba wara menatsüa akok," ta Dr Panda-i metetdaksü.

Paisa, "Tanabuba wave mapang nung iba wara kanga meproka tesemtem nung tangbo kanga proktsüa akok, iba denji kasa taoba mapang wara kanga bulua prokba district tem nung tangbo

kangabo meproksüa akok," ta paisa metetdaksü.

Tesüiba ghonda 24 tsüngda India nung ano nisung 42,909 dak coronavirus putetogo aser iba tashidak agi nisung 380 süogo, ta Hombarnü Union Health Ministry-i metetdaksü.

Tesüiba anogo troknü tashi linük nung coronavirus agi teshirangdakpur timba-timba akümer, aser tang teshirangdakpur 3,76,324 kumogo, ta health ministry-isa metetdaksü.

Amongnü samples 14,19,990 tendanga liasü aser tang tashi nung samples ajak senteper 52,01,46,525 tendangogo, ta ICMR-i metetdaksü.

### Nütsüng ajak nem vaccine agütsüba mezüngbuba state ji Himachal lir

**Shimla, August 30 (Agencies):** Himachal Pradesh ya tenem-tekong aliba state ka aser tsümgang-mopung kanga majung, ibayongji kanga tezülen aliba tesemtem nung coronavirus vaccine tutsütsü atema health workers aika tetsüng agi lenmang talang jajatsüsa akümer, ajisüaka parnoki kanga meranga inyakba ajanga India nung nütsüng ajak nem vaccine (mezüngbuba dose) agütsüba mezüngbuba state ji Himachal Pradesh kumogo.

August 29, 2021 anogo tashi nung Himachal Pradesh nung vaccine agitsü temsüa alir nütsüng 54,66,292 nem coronavirus vaccine agütsüogo.

Himachal nung arrshi kum 18 aser iba dang nungjagi temapur nütsüng lakh 53.77 lir, ta census nung ajemdaker health department nem osang agüja liasü.

Union health minister, Mansukh Mandaviya-i state nem tenümgang agütsüba sülen state Chief Minister, Jai Ram

Thakur-i, "Onoki shilem 100 dak tema agütsüogo aser iba ya takok tuluka lir. Iba naroküm ya health workers aser state nüburtem nem agütsür," ta metetdaksü.

Tain nütsüng shilem 100 nem mezüngbuba dose agütsüba atema Union Health Minister Mandaviya-i Himachal nung medical nung inyaktertem aser Covid anema rarartem nem tenümgang agüja liasü.

State health secretary, Amitabh Awasthi-i, taküm November 30 tashi nungbosa state nung temsüa alir ajak nem dose tanabuba agütsümar alitsü nükjidong lir; tang tashi nung dose anaprong agir nisung lakh 17.30 lir, ta metetdaksü.

Chief Secretary Ramsubhag Singh-i, "Tang onok nükjidongji tanabuba dose ajak nem agütsütsü atema lir. State ketdangsertem renema lir aser health teams training junga agia lir. Ajak dak alia union health secretary-i kü dang Himachal Pradesh nem vaccine peria agütsütsü ta nangzükogo," ta metetdaksü.



August 30, 2021 nü Bhopal nung aliba BJP headquarters nung Union Minister for Agriculture & Farmers' Welfare, Narendra Singh Tomar, Madhya Pradesh Chief Minister Shivraj Singh Chouhan, taoba mapang union minister Uma Bharti, State BJP Tir VD Sharma, BJP National General Secretary Kailash Vijayvarigya aser tangartemi taoba mapang MP, Kushabhau Thakre asoba anogomong amongdang tangokba noksa nung angur.

## Rocket amshia Kabul airport amakba White House-i jangjatsüogo



Kabul, Afghanistan nung rocket ka khaloktsüba agi raksatsür aliba gari ka anasa nisungtem nokdaka aliba noksa nung angur. Afghanistan nungi US-i anir linük balala indang sepaitem aser nüburttem anizüker aoba mapang Kabul nung international airport anasa rocket khalokja liasü, Tang tashi item rocket ya shirnoki khaloktsüar mejangjateti lir.

**Washington, Luroi/August 30 (Agencies):** Hombarnü Kabul airport nung rocket pongu khaloktsüba sülen ghonda ishika lir White House-i iba lendong atalokba jangjashitsüogo aser ashiba agi, airport nung inyakyim nung kecha timtem madoki maneni inyaksangshidar. "National Security Adviser Jake Sullivan aser Chief of Staff Ron Klain nati HKIA (Hamid Karzai International Airport) rocket amshia amakba indang osang tir nem metetdaksüogo. HKIA nung inyakyim nung tetsükdaksü kecha madoki maneni inyaksangshiba tir nem metetdaksüogo aser sepaitem nem teküzmükba agütsüsa atema tetuyuba agütsüogo," ta White House press secretary Jen Psaki-i ashi.

Reuters sangdong ka ajanga ashiba agi, US ketdangsur kati, rocket tem ya airport nung khaloktsü saka missile defence

system-i nokdang, ta ashi. Ketdangsurisa rocket ajak ya defence system agi nokdang asü masü aji mejangja aser America nung rongnung tasüba kecha mali, ta ashi.

Ajisüaka local media sangdong balala ajanga ashiba agi, rocket tem ya gari ka nung amenoker Afghanistan yimtiba kübok tesem balala nung khaloktsü. Tenük kuli agütsürtemi Associated Press dang ashiba agi, rocket tem ya Kabul kübok Salim Karwan tesem nung khaloktsü aser iba sülen prangbong khaa liasü.

Deobarnü US sepaitemi drone amshia Afghanistan nung amenokeraliba Islamic State pur suicide bomber tem mena aliba gari ka poksaktsüba sülen Hombarnü iba lendong ataloka liasü. Nüburttem anintsü atema maparen inyaktepa aliba mapang iba gari ya Kabul airport amaktsü

atema sentong yanglur apusoba liasü. Afghan nung ketdangsur kati ashiba agi, drone agi amakba mapang tanur asem tepsetogo aser kasa mapang nung CNN osang ka ajanga ashiba agi iba lendong nung kibong ka nungi nisung teku asü.

Brehostibarnü Kabul airport kima Islamic State-i amakba sülen Afghan nung 160 dak tema aser United States military personnel 13 tepseta liasü. US sepaitem rongnung Marines 11, Navy sailor ka aser Army soldier ka densema liasü aser US service züngsem 18 yirua liasü.

Tang tashi nung United States aser allies temi Afghan nung aser bendangertem densema nisung 114,400 aninogo. US ketdangsurtemi ashiba agi, Hombarnüa maneni nüburttem aninba maparen inyakdar.

## North Korea nuclear maparen asoshi tebilemetsü arur

**Seoul, Luroi/August 30 (Agencies):** North Korea-i nuclear reactor ka atemlokshi amai ajiteter, koba ajanga atomic nok-o-nü atema plutonium yanglu südi ta amanger, ta UN nuclear watchdog ajanga ashi.

2018 küm tatemlen sülen tang iba 5-megawatt (MW) reactor mapa inyakba yimyatem ajitet, kong nok-o-nü nung amshiba plutonium yanglutetsü amai züngshir, ta International Atomic Energy Agency (IAEA) ajanga Hokulbarnü sangdong ka nung ashi.

"North Korea indang nuclear maparen yagi maneni tebilemetsü khuret tulu agütsür. 2021 küm July ita tetenzüklen nungi iba Yongbyon nuclear complex nung mapa inyakba amai sayur aser 'cooling water' yokba ajiteter," ta ashi.

North Korea-i iba tesem dang ya par indang nuclear

sentongtem temolungjang ta ajar aser linük balalai küm aika yangji tenük yoka aru. Nok-onü nung amshitsüsa yangji plutonium mesüra enriched uranium kwi Yongbyon nung yanglu aser North Korea-i item osetji kong yua ali, itemji mejangja.

Pyongyang-i 2009 küm IAEA indang inspector tem meindokba sülen North Korea nung inyakyim kecha memeteter. Iba sülen North Korea nung nuclear nok-o-nü yangluba maparen tenzüka tendanga liasü. Iba linük nung nuclear tesüsa tendangba ya 2017 küm alitsü.

Tangbo IAEA ajanga North Korea ya meta nungi aser talisa satellite noksa tem nungi asadanger.

Linük yimtiba, Pyongyang nungi north tsütsü kilometer 100 shi pilar Yongbyon nungya iba linük indang nuclear reactor mezüngbuba amenok aser

North Korea nok-o-nü sentongtem atema plutonium ya iba tesem kisüng nung yanglur, ta meteta lir.

Vietnam nung 2019 küm iba mapang US tir inyaka alisang Donald Trump den senden ka amendang North Korea lenir Kim Jong Un-i Yongbyon ya loksatsü aser iba melena linük balalai tenokdangba agüja aliba salatsü shia liasü.

Saka iba mapang Trump-i iba sentong ya magizük, kechiaser North Korea indang nuclear sentong nung Yongbyon ya shilem ka dang lir aser tenokdangba aika agüja aliba salatsü malang, ta shia liasü.

Iba sülen US Tir Joe Biden indang administration ajanga North Korea sorkar den jembishinütsü asüngdang, ta ashi saka US-i par sentong nung temelenshi makai ken o jembitsü tejangraba mali, ta Pyongyang-i langzüa liasü.

## Malaysia PM tasenba tenangzük- tepba agiba sentong nung maden

**Kuala Lumpur, Luroi/August 30 (Agencies):** Hombarnü Malaysia Ato Kilonser tasenba sorkar tasenba kübok cabinet tenangzüktepba agiba sentong nung shilem magitet. Pa COVID-19 tashidak mena alir ka den ajuruteba sülen lokti nungi pilaa alitsüsa aküm, ta PM office sangdong ka ajanga metetdaksü.

Ismail Sabri Yaakob lokti nungi pilaa lir aser Mongolbarnü official National Day sentong nung virtually shilem agitsü, ta pa indang office sangdong ajangsa metetdaksü. Pa shiba den ajuruteba mesüra pa tashidak tendang medandang, mesüra pa mapang kobika lokti nungi pilaa alitsü iba indang osang tejangja magütsü.

Ismail-i August 21 nü office mapa belenzük. Taoba sorkari wara mazüoktetba atema nüburttem kanga temolung mesüi aliba mapang ka nung pai PM mapa belenzükogo. Malaysia nung August 5 nü nungi anogoshia nisung 20,000 tema dak tashidak puteta arudar aser tang tashi nung tashidak menar million 1.7 dak tema jungogo. Vaccine agiba maparen kanga kara odar aser vaccine agitsü temsüa alirtem shilem 62 nemo vaccine dose ajunga agütsüogo.

Taoba PM Muhyiddin Yassin-i office mapa agizükba sülen ita 18 shi lir August 16 nü mapa toktsü.

Ismail ya Muhyiddin indang deputy liasü aser Malaysia chubai sorkar anitsü pa shimba tetetzü kasa teloktep party-i sorkar kümetetba asütsü. Iba jenjang agiba ajanga Ismail'er party; United Malays National Organization tanaben linük yimsü asütsü asoshi shimogo, shirnoki 1957 küm Britain nungi nüjiso anguba sülen linük yimsüsüa arudar. Parnok 2018 küm sen dollar billion aika ochimashi amshiba ken o jateta jembiba teyalong nung election nung tsükdaksü.

Ismail-i taoba sorkar kübok Cabinet nungi minister tem tanaben shimba atema pa aitsüogo, kechiyong ita tenet emergency benokba aser June ita nungi tang tashi linük mokdanga yuaka parnok lenisüba kübok wara mazüoktetba liasü.

Hombarnü minister 31 aser deputy minister 38 tenangzüktepba agiogo. Ismail-i deputy ka meshim saka Malay-majority sorkar pelaa toktsütsü atema pai Muhyiddin-i teneta toktsüba minister mapa pezü maneni benokgo.

Ajisüaka nisung aikati taoba Science Minister Khairy Jamaluddin shimshiba pelashishia agizükogo. Khairy ya health minister liasü aser pa lenisüba nung vaccine agütsüba sentong inyaka liasü.

Malaysia nung COVID-19 tashidak agi asür nisung 16,000 dak tema jungogo.

## Louisiana nung Hurricane Ida agi kongshiogo; nisung ka asü

**New Orleans, Luroi/August 30 (Agencies):** Hurricane Ida ya United States nung kongshiba yipru tashi tulutiba ka ama alinük tonga aruogo, aser linük southwest tsütsü tükum nung mopung kanga sashia aoner, tzünglu arua Louisiana state tükumlen timba tzü agi mubanga lir.

Louisiana nung nütsüng yongsük timtiba aliba yimti, New Orleans ajunga nung power raksaogo, ta Deobarnü sangdong ka ajanga ashi.

New Orleans nungi northwest tsütsü kilometer 130

shi pilar Prairieville tesem nung süngdong ka laoa nisung ka yiruba sülen süogo, ta police temi ashi.

Küm 16 tejakdang Hurricane Katrina agi Louisiana aser Mississippi state tem nung kongshiba anogo kasa nung Ida yagia kongshi. Hurricane Katrina ya yipru telemsa Category 3 lir aser Ida ya Category 4 lir.

Ghonda ishika lir iba yipru ya Category 2 akum aser alinük nung mopung ya ghonda ka nung kilometer 165 tashi kera ona liasü.

(Maneni tapak 10 nung...)



Salt Lake City nung temo milen tsükloka asür bilemetetba mapang U.S. Marines Staff Sgt. Taylor Hoover indang noksa ka sayuba yangi angur. Kabul airport nung takum bendanga agütsür bomb pokloksüba lendong nung US sepa 13 asüba rongnung Hoover ya densema liasü. Iba lendong nung Afghan nung 100 dak tema asü.

**21 BUBA  
AO SENDEN  
YIMKONG MUNGDAW**



Anogo : September 3, 2021  
Mapang : 10:00 ako  
Teseu : Town Hall, Mokokchung

**TEMETETTSÜ**

- Iba Mungdang nung adentsü atema nūbu telem-sa yamai alitsü :
  - Ongpangkong : 40
  - Langpangkong : 40
  - Asetkong : 30
  - Jangpetkong : 30
  - Japukong : 30
  - Tzūrangkong : 30
  - Town Unit tulu nungi : 10
  - Town Unit tila nungi : 5
- Lokti/Kija kari Yimkong Mungdang dangi agenda bennūa lira pei Tzūkong Mungdang/Town Unit ajanger Federal Council ajanga abentsü metetdaksür.
- Ao Senden kilen saru magütsü alirtem iba anogo bener arutsü metetdaksür.
- Iba sentong asoshi ajaki sarasadema atadi.

**AO SENDEN  
2018-2020 MENDENPURTEM**

- Wb. Chubawati Longchar : President
- Wb. I. Imkong Jamir : Vice-President
- Wb. Imtipokhyin : Secretary
- Wb. Arentemjen Jamir : Asst. Secretary
- Wb. P. Maputemsu : Finance Secretary
- Wb. Aoshingang : Kimen

**MENDEN: MENDENPUR**

Sentong Tarensen

- Sarasademtsü : Wb. Dr. Bendang Longkumer Pastor, Artang Baptist Arogo
- Ao Senden Tir O :
- Tebu Tedi Ola (7 mins) : Wb. Bendangtoshi Pongen
- Tayongzükba O (10 mins): Wb. Metsübu Jamir Minister, Rural Development Govt. of Nagaland
- Osangtem agitsü:
  - Tongti Zülur
  - Aor Kilem Construction Committee
  - ASLB
  - Audit
  - Temzūng Reprangshiba Luden
  - Nūngtet Luden
- O'lemtep mapang :
- Menden Melentepba : Convenor, Nominating Committee
- Mendenpur Tanener O :
- Menden Tasen agizüker O :
- Tatem sarasadem :

**MOLUNGKIMONG BAPTIST CHURCH  
ORDINATION TEPELA LEMSATEPER**



Ao Baptist Arogo Mungdang (ABAM) ajanga 29th August 2021 anogo Molungkimong Baptist Arogo nung Pastor R. Moaliba Tsūngrem taochi aser lenisüba ma nung takok ngua ordain süa Tsūngrem aser nisung kulisüba tsūngdang Reverend agizükogo. Reverend R. Moaliba ya ABAM kübok ordain asüba rongnung 261 buba lir. Kangki khuret tuluba agizükdang Tsūngremer temoatsü aser leniba maneni na aser nür kibong den liang ta asen arogopur ajak sarasadem.

Talisa, ABAM Ordination Council dang iba Ordination mapa temoatsü manung agitsüba atema kanga pelaba lemsateper - Rev. Lipok Pongen, ABAM (Chairman); Rev. S. Moa Aier, ABAM; Rev. T. Ariba Imchen, DABA; Rev. T. Yanger, Longchara; Rev. Sentianger Alongkima.

**TENÜNGSANG AGÜTSÜR**

Ozü Changtongyatsür Mokokchung zūngsem nungi takotet lenir Wt. S. Arenla Lkr W/o. Tamsü Imchen (Mangmetong), shiba Sorkar tenzükba wadang nung Principal FAC, Mokokchung tashi inyaka arur, ano asen Aotsür tenzüksü asoshi 23 buba Watsü Mungdang Tir shimba asoshi la aser lar kibong dang kanga pelar.

La lenisüba nung asen Aotsür tejakleni anitsü Tsūngrem dang sarasadema atar.

**Sd/-  
Takumbaba  
President  
Changtongya Fellowship  
Mokokchung**

**Sd/-  
Tiawapang  
Secretary  
Changtongya Senso Telongjem  
Mokokchung**

Office of the

**Nationalist Democratic Progressive Party (NDPP)**

26 Aonglenden Assembly Constituency Mokokchung Region  
"Facta non Verba"

**PELABA LEMSATEPER**

Nübur timtemba ajiteta Ungma Aolijen lemjem nungi Kubza yimtsūng tashi aoba lenmang aser Settsü yimtsūng ajanga Alichen tashi lenmang renemtsüba atema 26 Aonglenden A/c Mokokchung indang NDPP zūngsemtemi Chief Minister Neiphu Rio aser Y. Patton, Deputy Chief Minister aser Road & Bridges Minister, Government of Nagaland dang pelaba lemsateper.

Tesüba küm 30 tsūngta iba lenmang ya aiben yanglushia liasü, saka tangang iba lenmang yanglushitsü asoshi maparen achaayanga aser temolung süa iba maparen takok ngua renemtsüogo. Iba maparen takok ngua inyakba den mapang shitak nung renemtsüba atema onoki contractor tem dang pelaba metetdaksür. Iba project tenzüker nungi tatem tashi nendaka achaayanga inyakba atema Executive Engineer, Mokokchung aser par team danga pelaba shisemer.

Maneni, iba Constituency nung iba project bener arua aser mapa kuma inyaksüba asoshi, Sharingain Longkumer, Hon'ble Speaker, NLA danga pelaba lemsateper. Chief Minister lenisüba kübok State renloka aser tejakleni aotsü asoshi Nagaland Sorkar telongjem nung maneni inyaksü onoki sarasademtsür.

**Sd/-  
Nungsangmeren Lkr  
President  
26 Aonglenden A/C**

**Sd/-  
Lendi Pongen  
Gen. Secretary  
26 Aonglenden**

**Emmy Award angusang Ed Asner süogo**



New Delhi, Luroi/August 30, 2021 (Agencies): Tenetben Emmy Award takok angur actor Ed Asner, shibai sitcom "The Mary Tyler Moore Show" aser drama "Lou Grant" anaprongla nung Lou Grant; aser 2009 animated film "Up" nung ola agüja shilem agi, pa arishi küm 91 nung süogo.

Ed indang publicist kati Variety dang iba osang metetdaksü. Deobarnü, Ed iba akümüli nungi pila ao. Ed'er kibong zūngsemtemi pa indang Twitter nung, "Oba na tesünep nung anisūngzükangma. Onoki na meimer," ta lemsatep.

Pixar indang Oscar takok anguba film - "Up" nung, Ed Asner-i Carl Fredricksen character atema ola agüja shilem agiba ajaki jangjaa lir.

Lou Grant ama "The Mary Tyler Moore Show" nung

angashia, tongtibang nūbu aikati asür kibong aser kinungertem den mangyim jashi lemsatepogo.

"Medemer tajung #EdAsner, shibai #CentralParkTV nung Bitsy'er adianu Ambrose ama ola agüja shilem agiogo, pa asüba osang angashia temolung raksar. Pa ya actor takoktet ka, temeim aser sempet tajung aketba nūbu ka liasü. Onok molung na teti alitsü aser onoki na kanga menungratsü. Ajisüaka, na kodak nung anisūngzükdar ta meteta onok pelar," ta Twitter ajanga actor Josh Gad-i lemsatep.

"Cobra Kai" show achaayanger, Josh Heald-i, "@CobraKaiSeries nung @TheOnlyEdAsner den külemi inyakba mapang tajangshiba tasen aika nguogo. Nisung peladaksütsü asoshi pa dak sempet tajung lir. Cobra Kai atema pai mapa tajung inyaksüogo. Onoki na kanga menungratsü," ta lemsatep.

Actress Maureen McCormicia, "Kü tembar tajung Ed, na tesünep nung anisūngzükangma," ta lemsatepa liasü. "Nü taküm ajanga onok ajungmeso aser nūbur asoshi nai tajung inyakogo. Na kanga dang menungratsü," ta Maureen-i shisem.

shilem magidang, Ed-i küm aika series television aser movie balala nung 'character actor' ka ama shilem agiogo. "The Mary Tyler Moore Show" nung takok ngua shilem agiba atema, Ed-i supporting actor ama Emmy Award asem angu.

Iba sitcom (The Mary Tyler Moore Show) temer sülen, Ed-i ano Lou Grant ama iba nūngja indang series (Lou Grant) nung shilem agiogo. Iba series atema, pai leading actor Emmys ana densema nomination pungo angu. Miniseries - "Rich Man, Poor Man" and "Roots" atema pai ano Emmys talila ana angu aser item ajak sentepa pai award 7 shi angu.

Tawa tashi Ed-i "Grace & Frankie," "Cobra Kai" aser "American Dad!" nung ola agüja shilem agiogo, ta variety.com ajanga metetdaksü.

Ed Asner asüba osang

**Karnataka police-i Sonia Agarwal apu**



New Delhi, Luroi/August 30, 2021 (Agencies): Bengaluru kübok temesepba mozü shibelenba maparen dak sendakba nung, Hombarü Karnataka police-i actress ka densema nisung asem puogo.

Police sangdong ka ajanga angazükba agi, Hombar anepdang team kati parnok (pua alir asem) talidak mita aoba mapang, actress aser Cosmetic industrialist Sonia Agarwal, industrialist Bharath aser DJ Vachan Chinnappa nung apu.

Par asempronlga Bengaluru East police ket nung lir aser iba maparen dak sendakba nung parnok dang asüngdangya liasü.

Temesepba mozü shibelen Thomas, shiba police-i pur liasü, pa dang asüngdangya aser osang tejanga agiba sülen, police-i parnok asem aliba ki mita aotsü asoshi maparen tenzüker.

Thomas ya Africa nung aser August 12, 2021 nü Govindapura tesem nung police-i pa apu. Iba mapang police-i Thomas ket nungi sen lakh aika alang temesepba mozü

(synthetic drug) ngutet.

Thomas-i police dang temesepba mozü shibelenba maparen nung Sonia Agarwal, Bharath aser Vachan Chinnappa nung indang inyakyimtem metetdaksü.

Pua alirtem yagi temesepba mozütem alizüka aser Bengaluru nung tongtibang nisung aser film actor tem nem lema agütsür ama temolung meleme bilemer.

Parnok talidak (pua alir asem) party tululu ayongzüka liasü, ta police sangdong nung shia lir.

Special police team temi Rajajinagar, Benson Town aser Padmanabhanagar, Banashankari 2 Stage nung actress Sonia Agarwal, industrialist Bharath aser DJ Vachan Chinnappa nung ki/talidak mita ao.

Team-i item tesem mita aoba mapang, Actress Sonia Agarwal lar kidang meliasü aser nija hotel ka nungi la apu.

Police sangdong ajanga angazükba agi, mita aoba mapang parnok talidak nungi team-i ganja ngutet.

## Paralympics: Lekhara aser Antil nati Gold medal nguogo



Avani Lekhara

Sumit Antil

**Luroi/August 30, 2021 (Agencies):** Shooter Avani Lekhara-i Hombarnü otsü tasen ka yanglua India tsürtem rongnungi Paralympics nung mezüngbuba gold medal ngutetogo. Lai R-2 women's 10m Air Rifle Standing SH1 event nung gold medal ngua liasü.

Arishi küm 19 tain asayar yagi world record yanglur aliba den kasa point ngutet aser Paralympic record tasen ka yanglu. Swimmer Murlikant Petkar (1972), javelin thrower Devendra Jhajharia (2004 aser 2016) aser high jumper Thangavelu Mariyappan (2016) nunger sülen la Paralympics nung gold angurtem rongnung densemogo.

SH1 Rifle category nung shooters temi pei teka nung prongbong amer khateter. Iba jenjang nung asayatem ya tetsüng nung timtem alirtem lir. Asayatem kar mener asayar aser kar nokdaker asayar.

Iba asaya nung China tsür Zhang Cuiping-i (248.9) silver

aser Ukraine tsür Iryna Schetnik-i (227.5) bronze medal ngua liasü.

Lakhera-i tang mezüngbuba international jenjang nung medal ka koktetogo. 2019 küm world championship nung la jenjang pezübuba nung tembanga liasü. Paralympics nung mezüng asayaba küm Lekhara world ranking nung jenjang pongububa nung liasü aser lai tetoktepba stage anaprongla nung point 10 nung kashia asaya.

Lai world record yanglur lila saka asaya tatemi point 9 nung aneben tashi akhaba ajanga iba jenjang majangzüktet. Qualification round nung Lakhera-i point 621.7 ngua jenjang tenetbuba nung qualify asü.

Tebui ajungmesoba sülen Lakhera-i shooting aser archery naprongla asayatsü merang, ajisüaka lai shooting asayatsü tejangraba liasü aser 2008 Beijing Olympics gold-medallist Abhinav Bindra indang kaket azüngba sülen la kanga

ajungmeso. La 2015 küm nungi Jagatpura Sports Complex, Jaipur nung shooting tenzü.

Lakhera mezüngbuba India tenüng nungi Al Ain, UAE nung 2017 World Cup nung asaya.

Maneni la mixed 10m Air Rifle Prone SH1, women's 50m Rifle 3 Positions SH1 aser mixed 50m Rifle Prone event nung shilem agitsü.

Kasa asayamung nungsa Sumit Antil-i pai yanglur aliba world record ajateta tebur Javelin F64 category nung gold medal nguogo. Pai nület meter 68.55 tsüteta gold medal anguba den otsü tasen ka yanglua liasü. Kasa asaya nung Sandeep Chaudhary jenjang pezübuba nung tembanga liasü.

Iba asaya nung Australia nunger asayar Michal Burian-i (66.29m) silver medal aser Sri Lanka nunger asayar Dulan Kodithuwakku-i (65.61) bronze medal ngua liasü. 2019 World Para Athletics Championships nung Sumit-i silver aser Sandeep-i gold medal ngua liasü.

## Asian Junior Boxing Championship: India-i gold medal 8 angu

**Luroi/August 30, 2021 (Agencies):** Asian Junior Boxing Championship nung India team-i gold medal ti nguogo. Iba den ano silver medal pongu aser bronze medal trok nguogo. AJBC ya Dubai nung asayaa liasü.

Final nung tetsür ter rongnungi trok-i gold medal angu aser pezüi silver medal ngua liasü. Teburtem rongnungi final asayar parnok asem rongnung anati gold medal angu.

India team-i Kazakhstan den gold medal kasa angu aser Uzbekistan ka agi dang memenep.

Rohit Chamoli (48kg) and Bharat Joon (+81kg), Vishu Rathee (girls 48kg), aser Tanu (girls 52kg) nungeri mezüng

gold angu aser iba sülen Deobar aonung tesüsa Nikita Chand (60kg), Mahi Raghav (63kg), Pranjal Yadav (75kg) aser Kirti (+81kg) nungeri gold medal ngua liasü.

Kirti-i final asaya nung Kazakhstan nunger asayar Shugyla Rysebek 4-1 agi akok aser Raghav (63kg)-ia Kazakhstan nunger asayar Algerim Kabdolda 3-2 agi koka gold medal angu.

Chand-i Kazakhstan nunger asayar Assem Tanatar akok aser Yadav-ia 4-1 agi Kazakh nunger asayar Akzhan akok.

Kasa mapang nung Rudrika (70kg)-i 1-4 agi Uzbek nunger Oysha Toirova makok aser Sanjana-a (81kg) Kazakhstan

tsür Umit Abilkaiyr-i 0-5 agi akok.

Maneni Aanchal Saini-a (57kg) Kazakhstan nunger asayar Ulzhan Sarsenbek-i 0-5 agi koka silver medal dang ngutet.

India nunger bronze medal angur tem rongnung Devika Ghorpade (50kg), Aarzo (54kg) Supriya Rawat (66kg), Ashish (54kg), Anshul (57kg) aser Ankush (66kg) nunger densema lir.

2019 küm Fujairah, UAE nung Asian Junior Championships asayaba mapang India team-i medal 21 (gold trok, silver teku, bronze trok) ngua tasembuba jenjang nung tembang.

## DALT-i MMA asayatem nem tenüngsang agütsü

**Dimapur, Luroi/August 30 (TYO):** Dimapur Ao Lanur Telongjemi sangdong ka ajanga Global Martial Arts Association (GAMMA) Asian MMA Championship, 2021 nung Nagaland nungi mixed martial arts asayar Kekhrieneitso Angami aser Longtsukumba

Ao nati silver medal aser Arnsenba Ozukum-i bronze medal anguba atema tenüngsang agütsüogo.

"Nenoki takok tajung nguteta Nagaland nung aliba nüburtem nem konang tetushi bener arutsüba atema tenüngsang agütsür. Nenoki temulungtetba

tulu nung tanen makai meranga inyakba ajanga taküm nung iba takok ajangzüktetogo aser tarutsü nunga maneni onok ajak nema dangdakja takok tajung bener arutsü onok timla aser sarasadem," ta DALT Media Cell sangdong ka ajanga metetdaksü.

## I-League Qualifiers nung team 10 shilem agitsü

**Luroi/August 30, 2021 (Agencies):** I-League Qualifiers 2021 asaya tenzüka Indian Football domestic season tenzüksü renemalir. Qualifiers ya Bengaluru yimti kübok Bangalore Football Stadium nung October ita nungi tenzüka asayatsü.

I-League Qualifiers 2021 nung state 10 nungi team 10-i shilem agitsü, koba Bengaluru Bio Bubble ka kübok ayongzüka asayatsü.

Taküm I-League Qualifiers nung Hyderya Sports FC (J&K), Corbett FC (Uttarakhand), Delhi FC (Delhi), Madan Maharaj FC (Madhya Pradesh), Rajasthan United FC (Rajasthan), Kerala United FC (Kerala), Ryntih SC (Meghalaya) nunger mezüngbuba asayatsü. Kasa mapang nung ARA FC (Gujarat), Kenkre FC (Maharashtra), and FC Bengaluru United (Karnataka) nungeria shilem agitsü. Parnokbo tanga mapang nunga asayaogo.

Item team tem ya peistate nung FA temi shimba lir aser league atema kuli kaketem aser club licensing dak sendakba nung maparen ajak mapang shidak nung benokogo.

"I-League Qualifiers asayaa Indian Football domestic season tenzüksü yongyaa atar. Taküm iba asayamung dak sendakba nung jangrademtsükaji taoba küm dang nungi taküm team

anasü agi timba asayatsü aser team tenet taküm mezüngbuba asayatsü lir," ta AIFF Leagues CEO, Sunando Dhar-i ashi.

"Team ajak central Bio Bubble ka kübok asayadaksütsü aser iba ajanga Indian Football tejakdangi bener aotsü atema onok bendanga agütsür aliba sayur. Asayamung nung asayatsü aliba team ajaki tajungtiba asayatsü imlaja atar," ta pai ashi.

Team 10 ya telok ana küma lemsar asayatsü. Group Stage ya round-robin format nung asayatsü aser team ajak par telok nung aliba team tem den khen khen asayatsü. Telok anaprongla nungi temaba team ana Final Round-i aitsü aser idakjia round-robin format nung asayatsü. Iba sülen I-League Qualifiers 2021 akokba team I-League 2021-22 season nung asayatsü atema maongka angutsü.

### **I-League qualifiers nung asayatsü aliba team 10 yamai alitsü:**

Hyderya Sports FC (J&K)  
Corbett FC (Uttarakhand)  
Delhi FC (Delhi)  
Madan Maharaj FC (Madhya Pradesh)  
Rajasthan United FC (Rajasthan)  
ARA FC (Gujarat)  
Kenkre FC (Maharashtra)  
FC Bengaluru United (Karnataka)  
Kerala United FC (Kerala)  
Ryntih SC (Meghalaya)

## Louisiana nung... (Tapak 8 nungi...)

Tzükümlen lendong tesashi ajurutsü aliba nüburtem dang anogo ishika jelia pei ki yutsür ainshitsü totuyuba agütsür liasü.

COVID-19 wave pezübuba agi kongshir aliba state nungya yipru tesashi aruba ajanga emergency medical services tem anena atatsüka akum. New Orleans nung COVID-19 agi shiranger nisung 2,450 shi lir, aser yangji aika intensive care units (ICU) nung lir, saka parnok anizüker aotsü lenmang meliasü.

New Orleans southwest tsütsü Lafourche Parish nung aliba Thibodaux Regional Health System hospital nung generator power raksaba yong medical nung inyakerteri shiranger nem teka agi tango sashitsü atema yaria liasü.

1850 sülen state nung kongshiba yipru tem rongnung Ida ya tashi tulutiba alitsü, ta Louisiana Governor John Bel Edwards-i ashi.

New Orleans nung tawa inokba levees (tzü muteta adokba nungi nokdangba) ya

meraksatsü südi ta amanger, kechiaser ibai tang ama yipru atema yangluba lir, ta governor-i ashi. Katrina yipru agi iba yimti nung kongshia yimti timba tzümettsüng agi mubangba sülen levees ya yanglua liasü. Iba Katrina yipru yagi nisung 1,800 dak tema takum samatsü.

Urban search-and-rescue team 13 densema iba region yagi emergency worker 2,000 dak tema chiyongtsü, tajemtsü tzü aser electric generator dena yokogo, ta White House ajanga Deobarnü shia liasü. Yangji aliba ketdangtsürtem, Red Cross aser danga lokti tentet balalai nisung 16,000 asemtsüsa ajungben jenokdak tesemtem ter dak tema anepalua lir, ta White House ajangasa ashi.

Ida yipru ya marudang US Tir Joe Biden-i Louisiana aser Mississippi atema emergency sangdongtsü melar liasü. Linüki Louisiana atema sarasademtsür aser yipru ajanga aoba sülen tashi ajunga agi yariteptsü, ta pai Deobarnü ashi.

## **BILEMDANGANG**

**"Taküm asadanga aliba ajanga temelenshi adoker."**